

Dahniq Launyaenq

De ndang reux miz di byom, naengnoh hau ngauez, aenda ndaem hung gig miz saenz, mwh de riu gwnz naj miz song aen cenjlaeuj gig ndei yawj. De couh dwg Loz Gyahnih deng gou heuhguh “dahniq launyaenq” haenx.

Neix dwg aen gyanghaet seizcou fwn doeksisi he, mwh lauxsae hwnjdangz naeuz: “Gyoengq doengzhag, cingj sou yungh ‘danghnaeuz’ daeuj cauxgawq.” Gyoengq doengzhag bouxboux cungj yaengx fwngez sangvid, hoeng Loz Gyahnih cix ngaem gyauej roengz, aennaj sawqmwh ndingyanyan, de caenhliengh yungh saw daeuj dangj aennaj de, lumjbaenz gouz lauxsae gaej heuh daengz de. Hoeng lauxsae bienbien heuh de: “Loz Gyahnih, cingj mwngz ndwn hwnjdaej cauxgawq!” De sien dwg yaemhywx mbat he, yienzhaeuh cij menhmenh ndwn hwnjdaej, de gaem ndaet gok buh mbouj cuengq, gvaq haemq nanz seizgan, de cij yaek gangj mbouj gangj gangj ok geij cih saw

害羞的女孩



daeuj, hoeng sing de iq lai, lumj duznyungz gongz nei.

“Loz Gyahnih, sing mwngz gangj hung di ndaej lwi?” Lauxsae hozswnh yawj dwk de,

lumj dwg gujli de.

Seizhaenx, gyoengq doengz-hag cungj yawj coh de. Gou hix vih de simgip: Vaiq di gangj ha! Sing hung di, mbouj lau law…… gaej nyex lauxsae huj ha! Sing hung gangj okdaeuj. Gou itmienh gag siengj itmienh gaem ndaet gaemxgienz. Gvaq haemq nanz seizgan, Loz Gyahnih cij menhmenh gangj: “Danghnaeuz ngoenzcog fwn doek, raeuz couh mbouj ndaej bae cinyouz lo!” De gangj sat le, couh yungh rengz haeb naengbak de, naj nding lumj aen makbingzgoj nei.

Rog cueng fwn doek sisi sasa, lauxsae sing hung naeuz: “Gizsaed mwngz cauxgawq ndaej gig ndei, danghnaeuz mwngz sing hung gangj couh engq ndei lo.”

“Danghnaeuz ngoenzcog fwn doek, raeuz couh mbouj ndaej bae cinyouz lo!” De dauqdaej sing hung gangj okdaeuj lo. Gyoengq doengzhag yawj dwk de, daihgya bekwngz gaksasa. De riu lo, aenbak de loh ok gij heuj hausagsag.

(roek nienzgaep Fan Yijnoz)

Duzvaiz Deng Ienuengi

水牛被冤枉

Duzvaiz youq ndaw naz gaenxgaenx maenhmaenh dajcae baenz ngoenz, seiz dauqma gaenq baeg ndaej daengx ndang unq liux, de ninz youq ndaw riengh baegfofo.

Duzma buet gvaqdaeuj yawj. Duzma sim'in naeuz: “Beixnuengx ha, baenz yiengh-neix sinhoj ha?”

Duzvaiz gyangz hoj naeuz: “Ai, beixnuengx, gou saedcaih daiq baeg lo, ngoenzcog caen siengj yietnaiq ngoenz ndeu.”

Duzma biek bae lo, youq gok ranz bungzraen duzmeuz. Duzma naeuz: “Beixnuengx ha, gou haxbaenh bae yawj duzvaiz daeggo, de saedcaih daiq baeg lo, de gangj de siengj yietnaiq ngoenz ndeu. Hix nanzgvaiz de ha, bouxcawj hawj de guhhong daiq lai daiq naek lo.”

Duzmeuz cienq ndang okbae, youq rog raen duzyiengz, de doiq duzyiengz gangj: “Duzvaiz ienq bouxcawj hawj de guhhong daiq lai daiq naek lo, de siengj yietnaiq ngoenz ndeu lo.”

Duzyiengz youq ndaw gyanghough raen duzgaeq, doiq duzgaeq naeuz: “Duzvaiz siengj hawj bouxcawj guhhong lo, de ienq hong daiq lai daiq naek. Ai, hix mbouj rox bouxwnq doiq vaiz swheij dwg mbouj dwg lai ndei di.”

Duzgaeq doiq duzmou gangj: “Duzvaiz mbouj siengj hawj bouxcawj guhhong lo, de siengj bae ranz wnq yawjyawj. Hix caen daiqgvaq lai, bouxcawj doiq duzvaiz mbouj in saek di, hawj de guh baenz lai hong youh naek youh uq, lij yungh bien haenqrengz fad de dem.”

Bancaeuz, yah bouxcawj daeuj gueng duzmou, duzmou naeuz: “Bouxcawj ha, gou lwnh mwngz nyi. Mboengq neix duzvaiz doiq bouxcawj miz yigen bw, mwngz aeu menhmenh son de. De mbouj nyienh caiq bang bouxcawj guhhong lo, de yiemz bouxcawj hawj de guhhong daiq naek daiq lai daiq baeg daiq uq lo. De lij naeuz yaek biek bouxcawj, bae ranz wnq bw.”

Daengz gwn caeuz, yah

bouxcawj doiq bouxcawj naeuz: “Duzvaiz siengj fanj mwngz lo, de siengj vuenh bouxcawj. Fanjgoet mbouj ndaej nyiuzcingz, mwngz naemjnaemj baenzlawz cei de?”

Bouxcawj dingq le, hozndat raixcaix, hemq naeuz: “Doiq bouxcawj fanjgoet, gajdai mbouj nyiuzmingh!”

Ngoenz daihngaih, duzvaiz baenzneix gaenx hong, baenzneix lauxsaed haenx, deng bouxcawj gaj dai lo.

Geijlai hojlienz ha! Duzvaiz dauqdaej guh gijmaz lo? Cungj dwg vah luenh cienz haih dai duzvaiz. Daihgya mwngz cienz gou gou cienz mwngz, saehcingz cungj bienq liux lo, geijlai haih vunz ha!

(Ganh Sozvwenz/甘说文 hoiz)



Seiqgeiq Lajmbanj

乡村四季

Seiqgeiq lajmbanj gyaundeix raixcaix.

Seizcin, faexnywj didngaz, duznnon ndiu dauq, roeg ciuz va hai. Henz loh, gwnz ndoi lajmbanj, vacwx doxceng hailangh, mbungqmbaj youq ndaw geh va diuqfoux, baenz le baenz duj baenz duj va rox diuqfoux. Gyoengqvunz caem youq ndaw geh va, sim sangj sim soeng. Lwngyez lajmbanj youq ndaw geh va guh'angq, buenx dwk va hom, buenx dwk mbungqmbaj diuqfoux, dohgvaq saedceij seizlwngyez.

Seizhah, daengngoenz wenjda, ndit ndat lumj feiz, gofaex raemhrwd. Lwngyez lajmbanj mbouj lau ndat! “Bum—bum—” diuq roengz dah bae, daengx ndang liengzgaungau. Ndaw dah raemxdah laecoco, gyoengq lwngyez dox baeuh raemx angqvauvau. Youz raemx baeuh raemx baeg le, couh bin hwnj hamq daeuj, mbaet aeu mbaw ngaeux he hoemq youq dinggyaeuj. Youq ndaw dah, miz seiz seizheiq ndei lij gaeb ndaej saek duz bya roxnaeuz gungq bw! Lwngyez lajmbanj youq ndaw raemx, buenx dwk diuzdah, buenx dwk bya gungq dohgvaq seiz lwngyezhung.

Seizcou, haexnaz demsou, gvamak sughenj, mbwn gvengq fwj mbanj. Gyoengqvunz youq ndaw naz nyaengq dwk sou haeux. Rumzcou ci gvaq, haeux ndaw naz boekfan baenz caengz baenz caengz langhgim, neix dwg lwnh hawj vunz nyi, bineix haexnaz soucingz gig ndei. Aenmak gwnz faex, nding lumj feiz, lamz lumj raemx, henj lumj gim, gak saek gak yiengh, cungj demsou neix hawj vunz angqyangz vuenheij. Lwngyez lajmbanj buenx dwk gaenxguh, byaij gvaq saedceij seizcoz.

Seizdoeng, rumznit cihuhu, naefaij mbinyangyang. Gyoengqvunz banngoenz bae cunz caenik baengzyoux, bae naz doekceh ndaem meg, bae gunghdi guhhong. Banhaemh, miz mbanj daengx ranz vunz an'onj naengh youq gwnz sahfaiz yawj densi, miz mbanj daengx ranz vunz humx youq henz daiz dwkbej, miz mbanj daengx ranz vunz ok rog bae youzbyaij lienhdang sanqsim……lwngyez lajmbanj buenx dwk ndawranz raeujrub, buenx dwk vunzcaen gyoengqde, byaij gvaq seizhung.

Gij neix couhdwg gingjsaek seiqgeiq lajmbanj—seizcinz daiq daeuj baenz ngeu baenz ngeu va hom, seizhah daiq daeuj baenz raq baenz raq liengzsangj, seizcou fan hwnj baenz caengz baenz caengz langhgim, seizdoeng vanq roengz baenz naed baenz naed maqmuengh.

(seiq nienzgaep Maj Mingzgyauh)